



partii naleraq

UPA 2015/140

18.05.2015

**Kommunit akornanni aningaasaqarnikkut naligiissarinerup sunik tunngaveqarluni sunillu siuertaqarluni pisarnissaanik oqallinnissamut siunnersuut.**

**(inatsisartunut ilaasortat, Inuit Ataqtigiit)**

Inuit Ataqtigiit Inatsisartunut ilaasortaataasa oqallisissiaat Partii Naleqqamiit imannak oqaaseqarfigissuarput.

Aallaqqaasiullugu Partii Naleqqamiit oqaatigissuarput, nunatsinni innuttaasunut atugassarititaasut nammaqatigiinnerup aqqani assigiinnerusariaqaraluarmata, tassami tamatta akileraarutitut akiliuteqartarpugut.

Taamaammallu aamma ulluinnarni inuuniarnikkut atukkatigullu assigiinngitsutigut atugassaritineqartut nalimmassarneqartarnissaat Partii Naleqqamiit pissusissamisoortutut isumaqarfingaarpud.

Apeqqutilli pingaaruteqartut, soorlu aamma inatsisartunut ilaasortat Inuit Ataqtigiinneersut oqaatigisaat ilaatigut nikuinnarluni nalilersoruminaassinnaasut sapinngisamik paaseqatigiiffiusumik toqqammavissinneqarnissaat Partii Naleqqamiit pingaartipparput.

Tassami kommunit sisamaangallartut akornanni naligiissarinermi nalilersungassat assigiinngitsut arlalissuusinnaappud.

Soorlu assersuutigalugu

- akileraarutitigut kommunit akornanni assigiinngitsumik akileraartoqartarpoq,
- Namminersorlutik Oqartussat Suliffeqarfiutaat amerlanerpaat kommuneqarfik Sermersuumiipput, akileraarutitigut kommunimut taakku qanoq nalerqarpat ?
- Kommunit tallimangussangaluarpata imaluunniit suli amerlanerulissangaluarpata, taava ?

- Ilinniarnertuunngorniarfiit, ilinniarsiillu allat inissisimanerat qanoq akileraartarnermut sunniuteqarpa ?
- Inunnik Isumaginninnermut aningaasaliissutit ?
- Sanaartornermi aningaasaliissutaasartut qanoq agguataarneqassappat ?
- Tunisassiorfeqarnikkut pissutsit,
- Umiarsualiveqarnermut, angallannikkullu pissutsit,
- Ineqarnermut tunngasut siunissami qanoq ingerlanneqassappat ? il.il.

Tassa suut tamarmik innuttaasut ulluinnarni atugaannut tunngasut, imaaliillaannarlu nalilersoruminaassinnaasut, kisianni annertunerusumik paasisaqarfigineqarnissaat pisariaqartut qulaajarluartariaqartut Partii Naleqqamiit isumaqarpugut.

Isumaqarpugullu taamaaliornissaq pisariaqartoq, kommunit aammalu nunaqarfinni aqutsisut qanimut suleqatigalugit.

Tassami ullumikkut takusinnaareerparput, kommunit aningaasaqarnikkut, ingerlatatigullu assigiinngitsorujussuarmik inissisimasut.

Kommunit suliassaqarfii, minnerunngitsumillu inoqarfiit assigiinngitsut aggulunneqarnerat qiviarutsigu, assersuutigalugu Qaasuitsup kommunia 30-it sinnerlugit nunaqarfeqarpoq, illoqarfiit arfineq pingasut, Qeqqata kommunia marluinnarnik illoqarfeqarpoq, nunaqarfiillu tallimat, tassani takoreersinnaavarput, sumiiffinni taakkunani innuttaasunik kiffartuussineq qanoq assigiinngitsigisinnaasut.

Partii Naleqqamiit kommunit nammineersinnaatitaanerata ataqquvarput, kisianni taamaakkaluartoq innuttaasut pisinnaatitaaffiisa illersorneqarnissaat pingaarnerpaajusariaqartoq isumaqarpugut, tassani Namminersorlutik Oqartussat assigiinngitsutigut innuttaasut sullinneqarnerannut atatillgu aningaasaliisutigisartagaasa nakkutigineqarnerullutik innuttaasunut tutsineqartarnissaasa qulakkeerneqarnissaat piomasaaqatigineqartariaqartoq isumaqarpugut.

Maannamut misilittakkat aammalu naligiissaarisarnermi kommunit ilaannut sillimaffigineqanngitsumik Naalakkersuisuniit iliuuseqartarneq innuttaasut sullinneqarnerannut kingunipilussinnaasoq pinngitsoortinneqartariaqartoq Partii Naleqqamiit piomasaraarput, tassami assersuutigalugu siorna Sermersuup kommunia “tassanngaannartumik” 45 mio kr—inik naligiissaarinermut

tapertussanngoriasaarnerata kingunerisaanik kommunimi sulisorpassuit soraarsinneqarput.

Taamaattumik nalilersuilluarnissaq pisariaqartorujussuusoq Partii Naleqqamiit takusinnaavarput.

Taagorneqarsinnaasut arlalissuusinnaangaluarput, kisianni soorunami naatsorsuutingaarput oqallinnerup ingerlanerani peqataalluarumaarluta.